



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa
27 Janeiro 2014

**Lideransa Lokal iha socu Casabauk kontente JSMP bele fahe informasaun
legál iha sira nia suco**

Iha 23 Janeiro 2014, *Judicial System Monitoring Programme* (JSMP) liuhusi Unidade Relasaun Públiku (Outreach) no Unidade LRU hala'o treinamentu kona-ba "Asesu ba Justisa" iha Suco Casabauk, Sub Tiloma'ar, Distritu Covalima.

Partisipante ne'ebé partisipa iha treinamentu ne'e kompostu husi estrutura suco sira ne'ebé inklui xefe suco, xefe aldeia, lia nain, feto rua no joventude feto no mane. Partisipante sira hamutuk ema nain 30, mane na'in 15 no feto na'in 15.

Matéria treinamentu ne'e kobre asuntu sira kona-ba direitu ema nian, kna'ar no kompetensia autór judisiária sira nian hanesan juis, prokurador, advogadu privadu no defensor públiku, polisiá no tipu sira kona-ba krime no oinsa comunidade sira prosesa kazu krime sira tuir sistema justisa formal.

"Treinamentu ba lideransa komunitáriu sira nu'udar komitmentu ida husi JSMP hodi bele kontinua fahe informasaun legal ba lider komunitária ho ninia estruruta tomak. Tanbá sira mak autór prinsipal ne'ebé hamutuk no hatene situasaun réal comunidade iha ninia suco rasik bainhira infrenta problema ruma no hein katak treinamentu ne'e bele kontribui ba comunidade hodi maneja sira nia konflitu tuir mekanizmu formal ne'ebé eziste" dehan Direitór Ezekutivu JSMP, Luis Oliveira Sampaio.

Iha parte seluk Xefe Suco Casabauk Sr. Quintino Cardoso iha ninia abertura hato'o ninia sentimentu kontente no agredese tanbá JSMP bele realiza atividade ne'e iha ninia suco. Iha oportunidade ne'e nia husu ba partisipante sira hotu, partikularmente estrutura suco sira atu fo atensaun no prioridade ba atividade ne'e, no nia mos espera katak depois de ativiadde ne'e partisipante sira iha responsabilidade boot atu kontinua hatutan informasaun ne'e ba comunidade sira ne'ebé seidak iha oportunidade atu hetan informasaun importante ne'e.

Partisipante sira ne'ebé maka marka prezensa ativu tebes, no hatudu sira nia interese atu hatene klean kona-ba materia sira ne'e. Sira mós rekomenda atu treinamentu hanesan ne'e bele kontinua iha sira nia suco rasik no suco seluk.

Tuir planu, treinamentu hanesan, sei realiza iha 27 Janeiro 2014, iha Distritu Lautem.

Atividade treinamentu ne'e realiza tanbá hetan suporta husi **Embasada Canada iha Jakarta-Indonezia.**

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl